



**SHAJRA E AALIYAH QADIRIYYAH BARKAATIYYAH RAZVIYYAH
RIDWANULLAHI TA'ALA ALAIHIM AJMAEEN
ILAA YAWM-ID-DEEN**

- 1) Yaa Ilaahi rehem farma Mustafa SallAllahu
‘Alaihi Wa Sallam ke waaste,
Yaa RasoolAllah SallAllahu ‘Alaihi Wa Sallam
karam kijiye Khuda ke waaste.
- 2) Mushkileiñ hal kar Shah e Mushkil Kusha ke
waaste,
Kar balaayeñ rad Shaheed e Karbala ke waaste.
- 3) Sayyid e Sajjad ke sadqe meiñ saajid rakh
mujhe,
Ilm e Haq de Baaqir e Ilm e huda ke waaste.
- 4) Sidq e Saadiq ka tasadduq saadiq-ul-Islam
kar,
Be ghazab raazi ho Kaazim aur Raza ke waaste.
- 5) Behr e Ma’ruf o Sarri ma’ruf de be khood
sari,
Jund e Haq meiñ gin Junaid e ba safa ke
waaste.

- 6) Behr e Shiblii Sher e Haq duniya ke kuttoñ
se bacha,
Ek ka rakh 'Abd e Waahid be riya ke waaste.
- 7) Bul-Farah ka sadqa kar gham ko farah de
husn o sa'd
Bul-Hasan aur Boo-Sa'eed e sa'dza ke waaste.
- 8) Qadiri kar Qadiri rakh Qadiriyoñ meiñ
uttha,
Qadr e 'AbdulQadir e Qudratnuma ke waaste.
- 9) Ahsan Allahu lahum rizqan se de rizq e
Hasan,
Banda e Razzaaq Taaj ul Asfiya ke waaste.
- 10) Nasraabii Saalih ka sadqa Saalih o Mansoor
rakh,
De Hayaat e Deen Muhiyy e Jaanfiza ke waaste.

11) Toor e 'irfan o 'uloo o hamd o husn o baha,
De 'Ali Moosa Hasan Ahmad Baha ke waaste.

12) Behr e Ibraahim mujh par naar e gham
gulzaar kar,
Bheek de Daata Bikhaari Baadshaah ke waaste.

13) Khaana e Dil ko ziya de rooh e Imaañ ko
Jamaal,
Shah Ziya Mawla Jamaal ul Awliya ke waaste.

14) De Muhammad ke liye rozi kar Ahmad ke
liye,
Khwaan e Fazlullaah se Hissah gadaa ke
waaste.

15) Deen o Duniya ke mujhe barkaat de
barkaat se,
'Ishq e Haq de 'Ishqii 'ishq e intimaa ke waaste.

16) Hubb e Ahl e Bayt de Aal e Muhammad ke
liye,
Kar Shaheed e 'ishq e Hamza peshwaa ke
waaste.

17) Dil ko achha tan ko suthhra jaan ko
purnoor kar,
Achhe pyaare Shams e Deen Badr-ul-'Ulaa ke
waaste.

18) Dil ko achha tan ko suthhra jaan ko
purnoor kar,
Suthhre pyaare Noor e Haq shams-ud-duha ke
waaste.

19) Dono 'aalam mein ho mujh par teri
rehmat ka nuzool,
Shah Ameer e 'Aalam ahl e safa ke waaste.

20) Naam e naami hai jinka Hazrat Ghulaam
Muhiyyiddeen,
Bakhshde mujh ko tu unke ittiqa ke waaste.

21) Mujhko Awlaad e Rasool e ba-safa ka rakh
ghulaam,
Shaah Awlaad e Rasool e ba-ziya ke waaste.

22) Qawl o f'ail o haal sab mein mujh ko tu
sacha hi rakh,
Shah Muhammad Saadiq e mard e Khuda ke
waaste.

23) Do Jahaañ mein khaadim e Aal e
Rasoolullah rakh,
Hazrat e Aal e Rasool e muqtada ke waaste.

24) Noor e Imaan, Noor e Qalb o Noor e qabr o
hashr de,
Bul-Hussain Ahmad e Noori ziya ke waaste.

25) Kar ataa Ahmad Raza Ae Ahmad e Mursal
hameiñ,

Mere Mawla Hazrat e Ahmad Raza ke waaste.

26) Saaya e jumla Mashaaikh yaa Khuda hum
par rahe,

Rehem farma Aal-ur-Rahma Mustafa ke
waaste.

27) Yaa Ilaahi Ghawth e A'zam ke ghulaamon
meiñ kar qubool,

Humshabeeh e Ghawth e A'zam Mustafa Raza
ke waaste.


28) Meri qismat ki buraayi neki se karde badal,
Hazrat e Bul-Qaasim e khair o huda ke waaste.

29) Hubb e Awlaad e Rasool e Paak de dil meiñ
racha,

Shaah Awlaad e Rasool e rehnumaa ke waaste.

- 30) Yaa Ilaahi behr e Hazrat Mustafa Haidar
Hasan,
Husn o safwat kar 'ataa unke gadaa ke waaste.
- 31) Yaa Ilaahi amn o Imaan de amaanatdaar
rakh,
Murshidii Sayyid Ameen e be-riya ke waaste.
- 32) Yaa Khuda Akhtar Raza ko gulshan e Islam
mein,
Kar shagufta har ghari Apni Raza ke waaste.
- 33) Yaa Khuda Aal e Raza ko charkh par Islam
ke,
Rakh daraksha har ghari Apni Raza ke waaste.
- 34) Yaa Mujeeb as-Sayi'lee harf e Du'a karle
qubool,
Ashraf ul 'Ulama Mujeeb e khushliqa ke
waaste.

35) Sadqa in a'yaañ ka de chhe 'Ain 'Izz o 'Ilm o
'Amal,
'Affw o 'Irf o 'Aafiyat is be-nawa ke waaste.



**DUA E MUNAAJAAT AZ-KALAAM E
SARKAAR AALA HAZRAT ALAIHIR RAHMA**

Yaa Ilaahi Har Jagah Teri 'Ataa Ka Saath Ho,
Jab Pare Mushkil Shah e Mushkil Kusha Ka Saath Ho.

Yaa Ilaahi Bhool Jaauñ Naz'a Ki Takleef Ko,
Shaadi e Deedare Husn e Mustafa Ka Saath Ho.

Yaa Ilaahi Gor E Teerah Ki Jab Aaye Sakht Raat,
Unke Pyaare Moonh Ki Subh e Jaafiza Ka Saath Ho.

Yaa Ilaahi Jab Pare Mahshar Meiñ Shor e Daar O Geer,
Amn Dene Waale Pyaare Peshwa Ka Saath Ho.

Yaa Ilaahi Jab Zabaaneiñ Baahar Aayeñ Pyaas Se,
Saahib e Kawthar Shahe Jood o 'Ataa Ka Saath Ho.

Yaa Ilaahi Sard Mohri Par Ho Jab Khursheed e Hashr,
Sayyid e Be-Saaya Ke Zille e Liwaa Ka Saath Ho.

Yaa Ilaahi Garmi e Mahshar Se Jab Bharke Badan,
Daaman e Mahboob Ki Tthandi Hawaa Ka Saath Ho.

Yaa Ilaahi Naama e A'maal Jab Khulne Lageñ,
'Aib Posh e Khalq Sattaare Khata Ka Saath Ho.

Yaa Ilaahi Jab Bahein Aankhein Hisaab e Jurm Meiñ,
Un Tabassum Rez Honto Ki Du'a Ka Saath Ho.

Yaa Ilaahi Jab Hisaab e Khandah e Bejaa Rulaaye,
Chashm e Giryaañ e Shafi' e Murtaja Ka Saath Ho.

Yaa Ilaahi Rang Laayein Jab Meri Be-Baakiyaan,
Unki Neechi Neechi Nazron Ki Hayaa Ka Saath Ho.

Yaa Ilaahi Jab Chalu Taareek Raah e Pul Siraat,
Aaftaab e Haashmi Noor ul Huda Ka Saath Ho.

Yaa Ilaahi Jab Sar e Shamsheer Par Chalna Pare,
"Rabbii Sallim" Kehne Waale Ghamzuda Ka Saath Ho.

Yaa Ilaahi Jo Du'ae Naik Mein Tujhse Karun,
Qudsiyon Ke Lab Se Aameen Rabbana Ka Saath Ho.

Yaa Ilaahi Jab **Raza** Khwaab e Giraa Se Sar Utthae,
Daulat e Bedaar Ishq e Mustafa Ka Saath Ho.